

# Violensia Sekretu

Nos a kustumbrá ku violensia. E ta hunga e ròl prinsipal den hopi pelikula. Diariamente notisia internashonal ta raportá aktonan salbahe di guera, asesinato, terorismo, sekuestro, bòn, tortura, èts. I aktonan violento: pelea, hinkamentu, tiroteo, atrako, homosidio, èts. a bira komún na nos islanan.

Ma tin violensia den nos komunitat ku hopi bes ta keda kubrí ku sekresia: violensia doméstiko, esta, violensia na kas.

Maske muchanan, adultonan, i ansianonan di ambos sekso ta víktima, nos ke dirigí nos atenshon na violensia kontra e dama. E por eksperensía violensia sikológiko (menasa), físiko (dal, skòp, kibra wesu, èts.) òf violensia seksual.

Kon frekuente e violensia ta? Algun aña pasá (1994), Sentro di Dama na Kòrsou a raportá den 11 luna 331 kaso di maltrato físiko, i 300 kaso adishonal ku damanan a sinti nan tan menasá ku nan a mèldu reshèrshi. Di 174 hende muhé ku a akudí na Poli EHBO e aña anterior pa haña asistencia médiko debí na leshon i fraktura, 93% tabata víktima di maltrato. I na nos isla “pasífiko” violensia domestiko ta un sekretu públiko maske no dokumentá.

Den un sintido, e violensia ta kuminsá durante noviasko. E yònkuman ta hinka den su kabes ku e yùfrou deseá **mester** ta di dje. Si e mucha muhé no ta aseptá òf ta riska kombersá ku un otro yònkuman, e mener ta bira razu òf ta afirmá ku e lo kometé suisidio...un táktika egoísta pa pone preshon riba e mucha muhé.

E mener no ke tende pa nada si e yùfrou ke terminá e “bibá”, espesialmente si e ta sospechá ku “su muhé” tin un amante. Su rasonamentu machista ta, “Si ami no por tin e, ningun hende mas por hañ’è.” E ta menas’è, batié, òf asta mat’è, anto ta argumentá ku ta amor a pon’è hasi’è. Por ta amor...**amor pa su mes**, mihó konosí komo **egoismo**. Sigur no ta amor pa e yùfrou.

Un estudio na Universidat di New Hampshire a sorprendé investigadónan, demonstrando ku parehanan bibá ta maltratá otro ku mas frekuensia i ku mas violensia ku parehanan kasá. Hende muhé bibá ta eksperensía violensia ku sinku bes mas frekuensia ku e dama kasá. Tambe e muhé bibá ta maltratá su “hòmber” ku mas frekuensia. (Ta pa nos mes bon ku Dios ta insistí pa hende kasa i no djis biba huntu!)

Maske Beibel ta bisa “*esposanan..mester stima nan esposa manera nan mes kurpa*” (Efesionan 5:28) i “*biba ku boso esposanan ku komprehshon, manera ku un vaso mas delikado... dun’è onor*” (1 Pedro 3:7), frekuentemente hende muhé kasá tin ku suportá hopi kos na man di nan esposo. E hòmber-burdugu ta baha su furia riba su kasá si e no ta trat’è manera rei den palasio, komplasiendo inmediatamente ku kada deseo.

Violensia kontra un esposa ta sigui un patronchi. Promé tin un periodo ora tenshon ta oumentá, sigui pa un eksploshon violento, i finalmente un periodo di duele i pidimentu di despensa. E pidimentu di despensa ta duna e dama speransa ku e hòmber lo kambia; p’esei e no ta raport’è. Otronan no ta raportá maltrato pasobra nan ke sa ku nan mes a okashoná e violensia. I tin bes, debí ku e dama a lamta den un kas unda el a eksperensía maltrato, e ta haña violensia domestiko un parti di bida normal.

**Ma esei NO ta normal!** E muhé ta sufri. I e yunan no solamente ta kome sla hopi bes, ma nan lo keda ku tendensia pa aktua violento ora nan establese nan mes kas. Pues, bo violensia na kas por multipliká violensia pa generashonnan binidero.

**P’esei, AWE ta e dia pa pone paro na e síklo di violensia.** Ehersé kontrol propio. “*Esun ku no ta rabia lihé, ta mihó ku e poderoso, i esun ku ta goberná su spiritu, ta mihó ku esun ku ta kapturá un stat*” (Provèrbionan 16:32). Ademas Dios ta eksigí, “*...sea kariñoso ku otro bondadoso, misericòrdioso, pordonando otro ...*” (Efesionan 4:32). Hesus por duna e poder pa kibra e síklo horibel aki i spar generashonnan futuro di violensia sekretu.